Publication: Berita Harian, Pg 16

Date: 05 April 2018

Headline: Academic Lily Kong appointed as SMU president

## Ahli akademik Lily Kong dilantik presiden SMU



PROFESOR LILY KONG: Provos Universiti Pengurusan Singapura (SMU) Lily Kong akan menggantikan presiden sekarang Arnoud De Meyer pada awal 2019. – Foto fail

PROVOS Universiti Pengurusan Singapura (SMU), Profesor Lily Kong, 53 tahun, bakal dilantik menjadi presiden universiti awam itu.

Ini kali pertama saintis akademik dan sosial warga Singapura diberi peranan menerajui universiti tersebut, menurut laporan *The Straits Times*.

Beliau akan menggantikan presiden sekarang Arnoud De Meyer pada awal 2019.

SMU yang berusia 18 tahun dan kini memberi tumpuan kepada bidang penyelidikan dan menawarkan kursus sains sosial, mengumumkan pelantikan Profesor Kong sebagai presiden kelimanya kelmarin.

Prof Kong, dikenali sebagai pakar geografi sosial, kebudayaan dan bandar dan peneraju kajian perubahan sosial dan budaya bandar Asia.

Pengerusi lembaga pengarah SMU, Encik Ho Kwon Ping, berkata universiti itu telah mengambil masa tujuh bulan mencari tokoh sesuai sebaik saja Profesor De Meyer memohon mengundurkan diri pada akhir tahun ini.

Encik Ho berkata: "Kami amat berbesar hati bahawa proses pencarian tujuh bulan ini membuahkan hasil, dengan pihak universiti melantik, buat kali pertama dalam sejarahnya, calon dalaman dan seorang saintis sosial sebagai presiden.

"Pencapaian Profesor Kong menonjol daripada senarai panjang lebih 100 calon dan senarai pendek yang mengagumkan daripada beberapa calon berkelayakan tinggi."

Profesor Kong pemimpin akademik di Universiti Nasional Singapura (NUS) selama lebih dua dekad sebelum menyertai SMU dua setengah tahun lalu.

Encik Ho berkata, Profesor Kong memainkan peranan penting dalam memacu banyak projek.

Antaranya, meningkatkan mutu pelajar dan tenaga pengajar, membangunkan program pendidikan dan tingkat kesan penyelidikan.

Beliau turut melaksanakan perubahan penting kepada proses kemasukan pelajar, termasuk pengenalan Sesi Hari Penemuan bagi calon yang memiliki potensi.

Ini antara lain meningkatkan mutu proses pengambilan pelajar.

Ketika menerajui program akademik, Profesor Kong mengetuai panel semakan dan mengesyorkan struktur sukatan pelajaran peringkat sarjana dan penyampaian kurikulum teras.